





列翠軒詩

詩之爲學微之道性情述義理顯之達乎國政非澹然寡欲其中至虛且明者不足與乎此而無濟世之才汲汲爲斯民之意則不能通乎治忽之故言之而不足以感人也舊稱韋蘇州詩格力閑暇意致簡遠朱子謂其氣象近道乃其居官閑閱有恤人之心發而爲詩合於風雅之遺音古太師之所採千餘年來嗣之者亦鮮矣真定梁君改亭生於相門踐履寒素世俗紛華之境毫不恣其胸次唯專意於古人之文章以其餘力爲詩骨清而辭



雅氣逸而神和豈徒雕飾摹仿以爲工而已君以明經筮仕初貳袁州政最擢爲守

天子特畀以蘇州聞命惕惕如不克勝下車以後廉靜慈愛斂不急而訟亦清自縉紳及編氓皆安之公事之暇吟咏自適兵衛森画戟宴寢凝清香韋詩所云遣是非而忘形迹者可相證無間焉君始赴吾蘇大受爲詩餞之陳

聖皇之眷循牧敘吳民之疲重賦事度緩急政次本末兢兢做古人之規君不以爲妄乃裒已所作

屬題其前自分少學詩頗識其體用邇年分纂詩經推述所以掌教六詩美教化移風俗者如改亭之詩可謂得其指歸矣乃吾所見改亭詩尚少俟刻其全俾卒讀焉挹昔賢之高風體憂民之素志援絃而和之豈不卓然千餘年之上也哉康熙歲在柔兆涸灘律中黃鍾之月哉生明嘉定張大受謹序

列翠軒詩

真定梁穆敬仲

送許亭育表叔之任永寧

舊任陝西邠州

曾留棠蔭古邠州
匹馬南天亦壯遊
悵別一亭燕市酒
夢回千里洞庭舟
雲蒸鈷鋸蛟涎滑
雨暗桄榔蜃氣浮
月照鮫珠空案牘
鷓鴣聲裏聽輿謳

送大叔祖下第還瀛海

漠漠輕陰釀曉寒
一聲驪唱促歸鞍
燕臺誰映芙蓉鏡
渤海仍淹苜蓿盤
柳暗紅亭春漸老
賦成白

雪和偏難不因人熱吾家事莫悵東風鍛羽翰
遺魏仲容菊花數本即次索花原韻

西風吹綻幾枝花淺碧深黃映水斜知爾胸中無
俗物平分秋色過鄰家

白菊

移來燕市裏栽向短籬傍皓質偏宜月寒芳獨傲
霜真能榮晚節猶喜澹秋光粟里人何在憑闌一
舉觴

春夜

日暮眾喧息嗒然塵慮忘小堂動疎星明月流清
光竹影紛閒階輕儵泳池塘幽花發疎籬時時送
微香素琴一再鼓恍疑在羲皇坐久羅袂寒春風
吹我裳悠然愜夙心婆娑幽興長袞袞東華塵恐
無此清涼吁嗟躁進徒勞勞空自傷

夜雨

酒醒夢初回蓮漏清可數怪底被池寒虛牕飛夜

雨

清明

一年又值禁煙辰細雨輕陰倍愴神新火依然寒
食候青鞵何處杜陵春不堪潦倒看花懶無那相
思對酒頻遙憶故園風日好綠楊隄畔草如茵

雨

冷燄暗孤檠夜雨滴殘漏遙憶曉風寒生怕花枝
瘦

立秋有懷

一葉驚秋至西風咽暮蟬物隨時序變人愛晚涼
天流水無心奏家山有夢懸倚闌頻極目詩思入

蒼煙

新築書室成

數椽新築愛吾廬布席焚香地有餘繞屋梅花春
試酒一簾明月夜攤書扉開時待羊求侶客過渾
疑水竹居更欲種蕉西牖下碧紗掩映影蕭疎

癸酉中秋

重陰開霽色佳月滿前楹影到秋中白光因雨後
清花前聊對酒樓上自調笙此際金臺客天人策
蚤成

題畫

一抹秋林冒夕煙數椽茅塢碧溪邊不知兀坐攤
書客讀到南華第幾篇

憶家園菊花寄坤兒

嬌容三變金鎖口俱
菊花名雙峰樓名

遙憶東籬菊清宵夢數回嬌容何日變金鎖幾時
開三徑秋初淨雙峰月自來平安須報我莫使曉
霜摧

讀宋鵝池詩集二首

宋君天下士著書耐牢愁肆力追正始聲譽傾王

侯長歌多激昂雅調凌千秋文筆更瑰奇髣髴韓
與歐空抱用世懷所志不得酬才高數不偶被褐
良足羞汗漫遊吳楚俵俵靡所投人窮詩益工興
酣恣冥蒐祇今一卷詩萬古仰風流

蘭生在空谷孤英挺清幽眈眈桃李花姿態何其
柔春風拂華滋好鳥鳴啁啾造物寧有殊託根良
不侔翩翩貴遊子綺羅擁道周千金供揮霍車馬
恣遨遊誰憐鵝池生半菽不可求豈無濟世才時
命歎不猶掩卷三太息暮雨下高樓

秋夜

涼月入虛檐蟋蟀鳴金井獨坐悄無言一片秋光冷

秋日旅懷

樓樹樹鳴蟬急長安又早秋近來鄉思苦不敢屢登樓

七夕

西風翦翦雨初收百子樓中待女牛一綫銀河千古恨數聲寒杵萬家秋兒童競乞金梭巧少婦偏

增玉塞愁媿我迂儒無寸補聊陳瓜果醉新筩

時聞

王師北征

送家兄之右江僉憲任三首

悠然齋裏讀書日霞舉軒中課藝時記得連牀風雨夜燭花影畔共聯詩

裊裊飛旌逐去鴻離亭把袂悵西風欲知別後相思處半在寒煙落日中

總角相依未暫離一朝擁節去天涯銷魂自與他人異不作尋常送別詩

立春日雪小集列翠軒聽陳郎度曲

此日東郊春意動枝頭小鳥聞新哢寒勒疎梅萼
未舒黛抹遙峰雲欲凍輕陰釀作六出花花飛頃
刻玉無瑕重簾不捲爐煙結九陌應迷白鼻騮良
辰佳景難虛擲灑埽書齋招飲客四座忘形笑語
譁和風一夕生几席辛盤愧說五侯鯖太和新釀
爲君傾吳鹽漫斫銀絲膾春韭偏宜玉糝羹秦青
雅擅梨園部小立銀屏歌金縷絲管啁啾竹肉清
新聲一串驪珠吐歌罷頻催酒盞空狂呼脫帽氣

如虹高城擊柝燭影紅習習兩腋生輕風進君酒
君莫却人生貴適志塵事何足縛君不見昔日高
陽號酒徒擊鮮沽酒佐呼盧又不見竹林七子稱
放達醉後不知天地闊况逢知己值三餘及時不
樂將何如

秋日口占

裏
秋花宛向人秋月明於水羈客總關愁頭白西風

庚辰花朝後一日雨中北上行役甚苦感賦

故園回首路漫漫細雨斜風襍被寒誰道花朝偏
寂寞自憐客興已闌珊三分春色愁中度一抹雲
山霧裏看遙盼炊煙松舍近不知何處解征鞍

喜雨

連朝苦暑晝偏遲喜見風回少女時暝色乍來雲
似墨苔痕初破雨如絲聲聲滴轉還家夢點點催
成卽事詩久客益諳離別味不妨風雨度相思

贈二叔祖

解組歸來理釣緡忘機鷗鳥日相親不知五柳先

生後如此高風更幾人

題畫扇

杉松滿院絕纖埃曲曲柴門傍水開地僻漫言無
客到一枝柔櫓破煙來

雨中栽竹

楚簟涼生午夢殘淙淙急雨響流湍茅齋怪底清
於水新種淇園竹數竿

送大叔祖侍養歸里

一疏陳情達帝閣蕭然襍被出青門幾人愛日

心偏切五柳還家道益尊
晚照西風憐瘦馬小橋
流水認孤邨趨庭喜值
新醪熟介壽頻開花底樽

中秋

清光此夕喜初圓
獨對孤檠思渺然
綠酒難銷蓬鬢雪
青氈冷入桂花天
鄉音迢遞來千里
京國栖遲近一年
午夜尚聞歌管沸
須知秋色鳳城偏

將入都門口占

不蹋青門路於今已六年
重來瞻鳳闕喜遇聽鶯
天暝色猶含雨垂楊半
裊煙桑乾遙在望曾否舊

潺湲

季夏望日同西邨叔父偶集蓉塘兄書齋

良辰偶集情偏洽綺席頻移興倍狂
琢碎竹叢明月影釀成花氣晚風香
形忘始識天倫樂坐久偏增笑語長
有酒如澠須盡醉百年消得幾歡觴

偶作

北牖蕭蕭竹東籬片片金
不容殘客到涼月坐彈

琴

送客

執手難爲別相看欲斷魂孤燈今夜月何處綠楊
邨

題桐陰夜月圖

梧葉甘蕉覆短籬秋香滿院晚風時懸知曳杖閒
吟客敲得桐陰夜月詩

海棠

誰把輕紅糝滿枝倚闌終日對仙姿淡煙疎雨妝
成後曉月微風睡起時國色漫憐妃子醉芳魂應
恨少陵詩纖穠不比凡桃李寄語東皇好護持

麗曠亭小集楊子昭以新詩見示依韻奉酬
曉露勻花色清談隔市廛乾坤容我漫懷抱爲君
開同賦梁園雪獨推謝朓才倘饒尋菊興九日許
重來

和叔瀾家兄夏日卽事原韻二首

白飯青芹飽卽休日長無事祇科頭邇來識得真
滋味開遍閒花懶下樓
數尺新篁一檻花吟詩啜茗足生涯靜中自有閒
功課不種青門五色瓜

讀淄川高侍郎詩集

晉代風流鄴下才
遺詩讀罷重徘徊
於今壇坫誰爭長
欲酌先生酒一杯

獨酌

清宵無事自銜卮
滿架圖書信手披
銀燭未殘人已倦
臥看秋月上羅帷

寓慈仁僧舍園丁以桂花數枝供余几案

忽把蟾宮影移來
慰客情天香雲外落
秋色坐間生碧葉
含新露金英識舊名
小瓶供榻畔涼夜旅

魂清

暮雨抵旅舍

帝鄉北望尚迢迢
暮雨孤燈第幾宵
欲問別來新客况
江郎情緒沈郎腰

遣興

經時無熱客幽事
最相宜敲枕聽疎雨
篝燈改舊詩松陰閒
澹茗竹塢靜彈碁酒
罷遲遲睡濃香滿被
池

送吳舒鳧南歸

爭傳雅望重騷壇燕市逢君似舊歡萬里遊蹤人
易老幾年懷刺鉞空彈凌雲賦就傾司馬破甑塵
生傲范丹初喜班荆還悵別潞河秋水正漫漫

得菊

蘭若無塵事雙扉晝不開黃花誰贈我如覩故人
來

題劉松年松風琴韻圖

愛聽松風遠市塵攜琴獨坐野溪濱不須更鼓高
山調知是羲皇以上人

九日

家釀名太和春余
別墅亭名麗矚

九日霜飛白鴈斜肯教秋色讓陶家太和春試新
筍酒麗矚亭移舊種花作達無妨邀翠袖風流何
必落烏紗夕陽紅葉饒幽致更倚枯藤看晚霞

讀外舅中丞公錦江十六疏

公自號龍
源漁子

讀罷風霜草泠泠淚濕裾廿年遼海鶴一帙錦江
書經濟推名士行藏託老漁危疆功尚在俎豆近
何如

題惲正叔設色芍藥

我愛南田客丹青老更工能將傾國色移入畫圖
中

甲申仲春赴宜陽司馬任

琴鶴無多累飄然出里門遠遊今日始拙宦素風
存柳色催行騎春陰黯旅魂故園回望處煙雨隔
孤邨

留別親友

無那陽關曲同羣影乍分江山千里別相思萬重
雲野渡冰初泮離亭日半曛章臺南去路花事正

紛紛

謁呂仙祠

暫停林外騎來謁呂仙祠檻曲隨流水亭虛納遠
颼一時蕉鹿幻千古利名癡欲探元中秘風塵未
有期

綠柳長廊

我愛磁州南去路綠陰濯濯影娟娟東風初散千
邨雨春色平分二月天夾岸有情張翠幕臨流無
語拂離筵長堤最是銷魂處一抹斜陽萬縷煙

曉渡黃河

蒼茫萬里曉煙浮柳色遙分古渡頭地入中原春
半老夢懸故國客偏愁輕風暖漾桃花水遲日晴
開桂楫舟築舍漫言無上策 廟謨今已慶安流

莫抵臨淮

春鳥關關春水生山光如黛柳依城怪來風景殊
前日行到江南第四程

定遠曉行憶雕丘叔氏鄉居之樂

春雨春風損客顏泥塗車騎怯登山雕丘邨裏槐

陰下此際先生尚閉關

江南道中

桃花如火柳如絲正是東風煙雨時越鳥聲聲催
布穀吳牛欸欸試春犁野泉漱石鳴天籟少婦當
壚唱竹枝舊是六朝佳麗地隔溪殘笛起相思

奉公入都遇家兄於慈仁僧舍小雪後歸途

書懷

風塵重睇五雲高雪落青門賦大刀北道喜聽連
夜雨西江又理舊征袍頻驚物候催驪唱剩有羞

囊笑馬曹歸到故園仍過客旅懷鄉思兩勞勞

保定西郊晚眺

夕陽繫馬趁閒遊遠矚寒煙入暝流紅樹半藏溪
上寺青帘斜颺柳邊樓飛湍疑挂廬峰瀑芳沼重
開易水秋三輔郊原稱勝地有無膏雨徧西疇

宿新城舖

孤枕難成寐寒宵欲二更近家思轉切薄宦慮偏
輕世事浮雲色風塵客子情凌晨期早發信宿又
長征

登雙峰樓晚眺

余室後建有小樓遙望古刹雙塔對峙因以名焉

主人久別雙峰樓曉風暮雨空悠悠晚來振袂重
登眺湘簾猶挂珊瑚鈎凭闌四顧風景暮潭園隱
隱迷煙霧傑閣千尋選佛場栖鷗萬點沱陽樹城
闕參差晚照中祇今何處孝王宮蕭蕭蘆荻韓溪
月漠漠嵐光龍首峰浮圖依舊雙峰列夕陽煙水
遙明滅衰柳千條拂野塘春風曾送人離別對此
茫茫黯不禁目斷南天空碧岑誰家更弄桓伊笛
一曲梅花千里心

使旋過里喜書隱叔六旬舉子走賀雕丘卽
事

重到西邨眼倍明垂楊深處叩柴荆籬邊鷄犬如
迎客巷內兒童尚識名怪底鄉人勞遠宦須知猶
子念先生充閭自是非常慶爲滯南歸一日程

述懷

之官才數月于役來燕京關山苦遼落擔荷良非
輕晨霜驅羸馬暮雨暗孤檠朝暮涉長道袞袞無
停征計日重九後緩轡入王城不辭瘁心力且

喜卸責成來時秋草衰去時春草生節候忽復易
遊子心怲怲旋車指鄉國重披舊茅荆再拜先人
墓霜露何淒清親友問從來執手歡相迎團圞話
竟夕情瀾未易傾開我列翠軒幽竹覆前楹三徑
未就荒疎籬綴秋英徘徊復瞻眺欲尋鷗鷺盟歸
家轉念家行期已屢更欲留更踟躕不能久稽程
振袂賦長往再濯臨河纓回首望故園黯然愴我
情幽懷誰與訴聊寄短歌行

乙酉元旦

時余便道旋家將
還西江同友人作

綺陌浮晴旭東風草又芳喜逢元旦酒卻在故鄉
嘗蠟鳳思兒戲雕龍遜客長秀江千里外應共此
春光

晚出里門

彈指離家三十里青山又送客長征鎮州却與并
州異回首鄉關無限情

途中立春

勞勞馬首染緇塵此日青幡又立春五種辛盤茅
店酒兩年風雪宦遊人晴光漸轉雲猶凍佳興雖

饒句未新有客徵歌明月夜柘枝舞倦柳腰身

水中鴈字

西風嘹唳過遙隄筆陣何來印淺溪三折兔毫痕
較淡一揮鳳諾尾偏齊濯將丹水羞蘇錦幻出玄
文妬宋鷄記語臨池須認取數行真本碧霄題

書詩橐畢偶作

且欣無酒病却愧有詩魔客路誰同調春風自放
歌衰攜清獻鶴帖檢右軍鵝寂寂還堪笑雕蟲未
足多

觀蹋歌

月光如水趁遊人澹澹晴雲細細塵莫厭蹋歌喧
夜市憑渠妝出太平春

元夕

記得傳柑夕鄉園燈火繁山邨風尚古明月閉閒
門

田家

西風吹落日牛羊歸遠邨荷鋤者誰子帶月欸柴
門天寒原野靜樹密鳥雀喧矮窗篝燈火織作聲

何繁睠彼田舍翁所急在饗飡手足雖胼胝身心
無畔援熙熙樂妻孥安知王侯尊何日遂初服耦
耕桃花源

風雨連朝暫駐車沙溝廠余去秋亦曾寓此
暫因風雨停飛蓋前度劉郎今又過春色不緣途
次減秋霜却訝鏡中多孤燈濁酒人敲句曉日輕
裘客渡河僕僕征鞍如轉轂青山悔別舊雲窩

途次柳泉次壁間女史韻

金屋誰憐瘦影單月明紈扇耐秋寒不知人面嬌

何似祇覺新詞秀可餐

春風甚厲日莫始抵旅舍

日莫風怒號予憐僕御目斷遠林煙客邸知何處

閨思

紗牕倦繡時獨步闌干曲芳草已芊芊眉痕猶待

綠

又

紅杏吐新葩黃鳥啼清晝秋雨不多時又是春風

候

桃山驛謁岳鄂王祠殿前石碣鐫王自書五

言律一首筆勢遒勁詩句豪邁可稱雙絕

桃山驛前日亭午我來駐車問風土居人指點路
傍祠爲道鄂王舊出處摳衣再拜仰威靈凜然生
氣衣冠古殿前屹立見豐碑鐵畫銀鈎過石鼓細
讀遺詩氣格雄描香繪粉安足數當日精忠泣鬼
神隻手欲將金甌補貔貅練就岳家軍擐甲人人
如虍虎不計中原久陸沈朱仙鎮上飛血雨唾手

燕雲志未酬遺恨失擣黃龍府權臣自昔妬武功
書生叩馬機先吐追尋往事愴我懷颼颼陰風生
空廡

莫次臨淮懷賡虞魏君

日落山色空暮寒生廣陌孤霞散餘綺隱映遙天
赤宛轉見淮流淼淼波光白沙磧泊歸鴻渡頭喧
船舶隔岸望城闔幾縷炊煙碧青青客舍柳春風
認舊跡沽酒滌塵襟遙憶濠城客分手二年餘相
離今咫尺良晤竟無由脉脉愁永夕

邨景

夕陽映遠林疑是桃花坼拭目認春風幾悞武陵
客征途千里餘此地景堪憚茅塢抱春流嘉樹紛
如織頓愜丘壑心還愧風塵役

先大父使粵集中有固鎮喜晴一律適至其
地感而成句

先人乘傳經遊地水驛山程憶舊時今日溪橋風
景在誰吟固鎮喜晴詩

過定遠縣

楊柳含煙鳥弄聲青山回首暮雲平不知馬足穿
多少三度來過定遠城

望岳鄂王祠

驅馬彭城道衆山如環堵回望鄂王祠暮靄凝寒
浦

自舒城至桐城山勢如環綿亘百里遵行曲

麓卽景成詠

濃淡千峰起高低萬樹叢夜寒猿叫月日落虎生
風泉灑懸崖雨橋飛曲澗虹鐘聲天半落何處梵

王宮

舒城行弔周公瑾

君不見昔日周郎真人豪齷齪羞同兒女曹千載
君臣契魚水一代風流占小喬水犀百萬聽揮使
叱咤電雹風颺起白面談兵細柳間紅牙顧曲春
宵裏劔淬鷓鴣氣更雄降幡肯使出江東奇謀獨
埽多士策東風一炬千艘空如駛雙丸幾人代龍
拏虎擲復誰在流水空自抱寒岑暮雲猶捲旌旗
態我來弔古放悲歌當年吳蜀計亦訛長江據天

塹劔閣復嵯峨二雄勢既合智勇何其多義旗直指向長安未必天心眷老瞞吁嗟乎一時瑜亮誠同氣炎祚豈能鼎足觀

桃城晚眺

邨景甚佳素多名釀

紅橋曲曲柳毵毵新漲溪流碧似藍兩岸煙光千日酒春風留客醉江南

陶冲驛和壁間韻

逶迤山翠抱孤邨新柳深藏野店門駐馬板橋看暝色一溪春水浸雲根

望龍眠山奉懷桐城相國

龍眠新雨後嵐翠望中分花影離披見松風斷續聞幾家團野岸一鳥入斜曛遙憶東山客三年臥白雲

桐城相國以篤素堂詩見示賦謝

公新築別墅雅類平泉雙溪其

佳勝處也

讀罷新編倦眼開香山懷抱劔南才世情諳後機偏少詩境佳時興自來三殿幾回辭密勿雙溪終日對亭臺園林荆棘刪應盡桃李還須作意栽

午發小池驛西望煙巒宛如圖畫

巖際暝煙千里合松陰茅塢幾家閒誰將董巨橫
披畫展向春風碧落間

野塘

野塘新漲滿疑似桐江水止欠羊裘翁把釣煙波
裏

雨後過大關

日日看山不厭山欲憑空翠浣塵顏頻添黛色因
微雨直冒春寒過大關柳葉開時鶯亂語松濤落

處鶴初還有無避世棲真客鐵鎖懸崖未可攀

山行

餐香飲翠有因緣日日嵐光黛影前却愧我無蘇
陸筆盡收清景入詩篇

渡潯陽江

潯陽江邊朝日出林光暄轉晴霞側千山杳靄望
中分萬里澄波淨如拭舴艋前驅彩鷁輕東風不
借蒲帆力江州城郭辨微茫白傅遺跡誰能述鷗
鳥眠沙意自閒江豚吹浪形偏匿五老迎人天外

青匡廬面目今能悉鎖江樓俯江之涯杖策登臨
興自逸天風颯颯吹我衣金庭弱水如堪即憑誰
寄語韓溪翁山川能助龍門筆欲騁曠覽千秋懷
廬嶽之約不可失

行廬山下暮宿通元驛

擊楫渡江來驅馬登山麓嵐翠染衣裾煙景豁心
目諸峰態各殊朶朶芙蓉簇松籟響笙竽泉聲戛
金玉行行陟層岡俯瞰田家屋新綠何芊綿春田
多野藪迤邐途漸平祇林隱修竹迴望五老峰空
青天外矗樹杪夕陽收山容益蒼肅夙志耽林泉
茲行快幽獨欲寫臥遊圖夢踏春山綠

初自都旋登滕王閣

滕閣幾年聞勝蹟登臨此日豁雙眸章江春暖人
初到鶴嶺煙消雨乍收帝子歌鍾餘晚照賓筵詞
賦想風流最憐丹雘開生面明月南樓幾度遊

落成而中
丞解組

戊子立春前三日賴絳侯兄弟招同湘江諸
子集霞綺園次蕭岫嶠韻四首

名園聞說閱滄桑喬木依然曲水傍看竹攜來求
仲侶探花分得令君香山容薄暮初添紫柳色迎
春欲染黃雅集何殊修禊會有人乘醉寫銀光
此日桃源許問津溪聲林影靜囂塵肯教逸興隨
年減漸覺春光刺眼新蘭草有蓀知世澤荆花無
恙見天倫醉餘倚石看殘照一抹炊煙渡水濱
平泉花竹自年年一帶繚垣薜荔牽好客常懸高
士榻臨池徧寫益州箋湘梅繞塢香初散粵鳥穿
林語乍傳欲去還留情不厭愛他新月更清妍

心跡偷閒喜暫清枝頭好鳥聽嚶嚶戲翻楸局憑
獨犬欲破愁城藉酒兵賓主忘形情始洽山川有
待月初明談玄揮塵皆名士碌碌慙余得抗行

歸途口占二首

湘江一載課桑麻流水聲中蚤放衙吏不見能民
自樂邨邨開徧野棠花

客懷夜夜苦思家此日揚帆湘水涯欲問宦囊何
所獲春風載得一船花

留別湘江諸子

丙戌月在丑代庖來會邑山城僅彈丸賦寡民俗
質適合迂拙性琴堂日嬾出余豈好優游求治不
在急亦知涉世法虛名原不必脂車易轉輪膠柱
難鼓瑟第恐玷家聲祖德無由述以此甌生塵不
歎囊羞澀一事猶堪慰湘水才難及賴子絳侯喜

結交文

安石山起沈

種鳧叔子爛詩律青蓮

湘橋永莊

才卓犖夢得

源巨性藹吉游肇亦修與穎士恂春華兼秋實日從名

士遊如入芝蘭室尋春頻載酒談心常促膝文酒
正娛樂驪唱催歸疾河橋柳始垂江岸草初茁黃

烏鳴嚶嚶桃花暄朝日對此惜離羣令我青衫濕
欲致繾綣懷覩縷難遽悉但囑勉加餐牖戶蚤補
葺春寒雨雪盛北風方颼颼

泊舟章貢喜晤孝穉弟即送之歸羊城二首

暫停歸棹客江城聚首天涯弟與兄愧我官貧無
可贈吟成七字送君行

幾年雁羽重相思乍喜聯牀又別離須記雙江分
袂日烏啼花落暮春時

題朱翠庭桂枝圖卷子

鳳腦何緣產桂枝金風玉露漫相疑主人筆底花
難盡釀出輪囷五色芝

宿聚雲菴

三年湘水客兩過上方眠雲合疑無路峰迴別有
天宗風談世外花雨落堦前愧負東林約淵明不
解禪

遊百花洲

新加修葺
頗稱幽勝

一逕逶迤入坡陀勢轉紆紅橋新北渚碧水舊東
湖石罅輕條出蕉坪野鶴呼倚闌凝睇久疑是輞

川圖

蕭岫嶠以尊公來巢先生贈言卷子屬題

先生駿鸞去已久至今章貢留高名翫髒氣骨罕
儔匹盤山巖嶭湘水清夙志未酬鵬鳥入年年花
落空啼鶯有子象賢稱驥足詞源筆陣何縱橫行
看一日致萬里彤庭射策冠羣英嗚呼繼述有人
可無恨逍遙緱嶺聽吹笙

送陳謙齋學博歸上谷

十載論交意獨真太丘何事竟抽身由來強項偏

違俗此日蛾眉善妒人出處尋常吾道貴圖書雜
選客衰貧歸家莫漫悲岐路棠蔭年年滄水春

蠟梅

檀心縷縷散幽香不與時葩鬪豔妝想見花神初
學道羽衣特地染輕黃

九日遊湖山臺

九日天氣佳曉色映簾幕官舍苦跼蹐欲踐登高
約賓客四五輩聯轡出南郭迤邐渡前溪逡巡到
山脚石級苔蘚滑屢進還復卻鼓勇陟層巔心目

頓開擴遠水綠於藍平田繡而錯何處墜秋聲微
風掃寒籜入門禮世尊柏子庭前落我聞鄧僊人
曾此乘黃鶴丹臺蹟已湮清景猶如昨老桂影扶
疎枯松勢拏攫解帶聊盤桓踞石恣笑謔午磬腹
正枵隨緣飽藜藿食罷扣無生老僧來後閣闡發
真實義爲我解塵縛始知落言詮究竟屬糟粕茲
遊良不虛灑然得真樂欲擬龍山吟愧我筆力弱
且即眼前景朗誦淵明作

狀元洲

一灣流水千株柳盧肇當年構草堂我欲題詩頻
閣筆宣城七字在宜陽

宜春臺

孤臺千尺迴闌檻俯飛鴻禾黍西風外人家寒雨
中溪雲過水白返照射山紅古蹟憑誰問蒼煙起
暮空

釣魚臺

砢磷石壁水悠悠知是何人把釣鈎贏得至今名
不朽桐江一樣想風流

遊化城巖

暖風初鳴簷前鳥漫向城南蹋春草沿堤弱柳染
麴塵一羣花鴨戲芳沼黛色迎眸知何處化城巖
畔東風早嶙峋怪石虎豹踞槎牙老樹藤蘿繞策
杖褰衣逞遙矚髻鬟點點羣山小青蓮洞裏更深
邃嘉名錫自宛陵老一峰側出勢若懸睽暘疑驚
天柱倒我聞袁仰山絕奇似此欽岑幽秀少盤礴
竟日興未窮夕陽已挂蒼松杪歸鞭迴指讀書臺
遺蹟蒼茫誰探討山川無恙人事非僕僕風塵何

日了逝將解組焚銀魚西屏臥對青山好

西屏恒郡山名

初春諸子邀集蕭岫嶠南臯草堂賞桃花二

首

何處探春信相將過草堂風恬花欲笑酒熟甕流

香古木延黃鳥新詩疥粉牆主人情未竭洗盞話

斜陽

壁黏余遊霞綺園詩

射覆頻呼酒分泉更品茶人風真可愛時事漫興

嗟鳩喚千峰雨蜂喧一樹花不須辭爛醉知己聚

天涯

題賴晉公小像

湖海曾聞汗漫遊歸來小築愛山丘不知戶外塵

多少白石清泉碧樹秋

雙峰樓八景

小院春陰

不教通熱客祗恐損苔錢獨坐春風裏輕陰二月

天

高樓聽雨

小閣夢初回香篆餘殘縷瀟瀟何處聲多是芭蕉

雨

平臺秋月

攜手上平臺倚檻看秋月莫道月光寒有人在瑤

闕

暖閣栽梅

我愛緜梅種慙懃手自栽似諳丘壑趣先傍硯山

開

雙峰晚照

古寺峙雙塔突兀撐晴空扶杖頻登閣貪看晚照

紅

曲牖朝暉

花欹柳亦眠積陰如中酒忽聽鳥聲繁暖日烘窗

牖

疎籬幽花

疎籬宜皎月孤性愛幽芳記得前賢語金銀無此

香

遠林殘雪

遠林冒殘雪玉蕊休相訝添箇跨驢人便是營丘

畫

已丑中秋

三載中秋月今同倚檻看浮雲誰盡掃素影恰初
團酒渴呼從事香飄憶廣寒不知金粟下幾許共
乘鸞

十六夜

東嶺遲遲出依然寶鏡懸幸逢光似水莫惜酒如
川瑩白花間露空青雨後天有人憐此夕欹枕未
成眠

哭大兄二首

叱馭喜聞過劔閣騎箕驚說返高旻一門宗祀惟
孤子萬里岷峨幾故人強起東山應有恨既來西
蜀且安貧如何輕赴瓊樓召血染麻衣涕淚新
猶記家園酒一卮慙慙執手話臨岐豈知乃弟長
征日是與吾兄永別時拙宦自應囊似洗清風空
說口如碑祗今瘴雨蠻煙裏日日啼鶉哭總帷

紅梅

與爾離羣久重逢欲斷魂年光真逝水春色忽迎

門瘦倚燈前影紅添頰上痕羅浮當日夢逸韻至今存

苦雨

厭聞鳩婦喚聲頻點點空階故惱人竹壁漏成三折筆盆梅瘦損一分春旋開舊甕排寒力細剪新裘護病身安得封姨來廣莫凍雲掃盡見高旻

雨中迎春

分符七載佐袁州又見笙歌送土牛積雨似爲春洗路好風可與客吹愁銀幡綵勝新芳序白馬紅

妝舊冶遊如水門屏公務少一尊臘酒戲藏鈎

辛卯元旦

青陽乍轉旭日新映竹清溪已粼粼盤中綠菹嘗鄉味檻外黃鸝鳴好春竊欣四民深知我愧無一事差強人南窗寒花初綻蕊且同婦子傾金樽

放歌行

我欲手提三尺斬鯨鯢又欲丹成九轉跨鸞鳳不然花壇揮麈說詩書抑或螭頭珥筆紀言動四者於我既無分胡爲摧眉折腰日趨走區區戀此五

斗俸我亦有綠野堂當階紅藥翻風香我亦有晚
香圍繞籬黃菊凌霜吐雙峰樓外萬山秋列翠軒
中三月雨風光如此不還家笑殺小山叢桂花君
不見陶淵明五柳歸來百慮輕又不見司空圖三
休高臥一事無古人高蹈誠有見何獨吾徒不丈
夫丈夫有志貴自適好色飲醇殊可惜信陵終是
豪華客

戲擬微之體二首

吟成柳絮憑誰和妝比芙蓉祇自憐料得日高猶

未起春愁濃壓繡牀眠

數聲啼鳥夢初醒畫罷雙蛾倚翠屏春日乍長無
箇事戲研花露寫蘭亭

讀綿津集題贈二首

杜韓已爲土蘇陸亦成塵莫漫嗟風雅中原尚有
人

官閒唯飼鶴興到即吟詩掃地焚香坐居然韋左
司

送春

風煙已變早春妍物候偏憐暮景天滿徑膩紅花
浥雨一簾縐白柳飛綿難憑苦茗搜新句聊藉殘
書引晝眠攬鏡顛毛驚種種悔教薄宦擲華年

題葛廬賓太守小像

心閒敷政自優優淶水亭邊正好秋一樹名花千
斛酒不吟詩句也風流

盆山

蕞爾盆中景居然萬壑秋樹分平遠色山似翠微
浮底用開圖畫真堪當臥遊晚風涼月好逸思滿

滄洲

秋雨

最愛秋容澹兼無案牘忙寒雲迷古堞細雨釀重
陽白日閒中得黃花靜裏香悠然堪吏隱何必話
羲皇

菊

天然無俗韻何用炫濃妝自有孤懷客能憐晚節
香種繁思故國花發過重陽似爲逢初度清芬佐

舉觴

季秋望八日爲余
初度菊始華故云

冬夜步月友桂亭

晝短夜苦長未能遽就枕燒燭坐觀書意味頗難
盡缺月忽瞰人灼灼浮欄楯茲景寧易逢負之良
不忍起步到書齋露冷風淒緊一片空明中浩歌
且獨飲

十二月廿七日雨中迎春

東皇初命駕和氣已迎人漸覺風披凍却慙雨墊
巾吏民祈歲稔簫鼓慶年新莫道山城陋依然浩
蕩春

得董帖

自笑臨池功太疎年來痴嗜換鶯書無心獲得雲
間帖十五秦城總不如

戲作硯山歌

我聞米老袖中石如玉蒼翠欲奪我嶺綠畸人怪
石遇何奇地骨雲根恣所蓄更有一石袖不得碑
岿巉巖勢重複側峰或似驥奔泉橫嶺還如龍偃
伏兩崖夾束一線通知是何年神斧劖旁有一池
深且幽潤極恍疑水可掬宜雨宜晴黛色浮佳人

鏡裏新膏沐不謂坡陀尺寸間頓現二華與九曲
彭城司農推博識不數奇章愛雲麓何處搜得碧
玲瓏一朝分送蕉林屋大父嗜古更成癖日餐秀
色忘枵腹我承遺澤謹護藏不敢輕摩矧敢瀆一
行作吏走天涯久別清光慙碌碌何時歸臥雙峰
樓再拜丈人謝馳逐

題丁南羽滌硯圖

幾箇長松覆屋數竿修竹當門戲引山泉洗硯要
看墨染雲根

辛卯除夕風雨

前宵春已到天涯爆竹聲中起宿鴉誰撥鶻絃翻
濮索自烹雀舌酌梅花東風欲轉千門柳霽色偏
遲萬里霞三百六旬今夜盡麗譙鼗鼓莫頻搗

壬辰元旦

一夕和風轉大鈞吟情亦覺與時新悠悠五十年
間事鹿鹿三千隊裏人得歲兒童爭跨竹忘懷老
子欲垂綸頌椒念切閨中婦弱柳搖搖怯素春

正月十三日大雪

夕陽車言
朝寒方擁絮敲枕聞騷屑起視牕紙明簾外飛春
雪片片仍到地喜近上元節呼童莫埽除留以伴
新月登臺縱遠眺寒光生眼纈一抹青山痕半冒
霜林蘖隨意哦小詩聊復自怡悅何事誇髯翁白
戰無寸鐵

月夜

新月照殘雪冰心比較潔移座近梅邊相對成三
絕

雪後出郭

不出郊原外焉知天地春亂山殘雪暮一逕野梅
新活活溪流玉飄飄鷗遠人東風無限思日落照
江濱

盆梅

不得山中賞聊同水際觀暗香迷曉夢老幹耐春
寒位置偏宜竹丰標自友蘭重簾須護惜飛雪正
漫漫

又

一枝瘦影倚牕閒肯爲東風強破顏莫誚龜堂斷

火食丰姿原不似人間

元夕前二日卽事

雲斂長空玉宇清
魚龍結隊遶春城
人喧夜市塵初暖
簾捲東風月自明
獨對華燈慙齒髮
却看霽雪兆昇平
佳時莫負鷓鴣杓
濃酌如泉細細傾

題胡笠田荷戟小照

君才沈謝與劉何
底事從軍欲荷戈
畢竟玉關人易老
春風不及杏園多

元夕後雪小集友桂亭再疊前韻

應知萬戶慶時清
邨笛山歌半入城
月色何妨雲抹淡
燈光依舊雪爭明
交深言自如蘭臭
戰勝心還似水平
我有索郎風味別
小槽新壓爲君傾

新葺友桂亭二首

莫笑蝸廬十笏強
心閒到處可徜徉
縱橫架上五千卷
跌宕花前三萬觴
雲覆蕉陰縈北牖
風敲竹韻入東廂
黃昏客退無公事
細檢冰芽自煮嘗

車馬看人日日忙
小山叢裏得相羊
徘徊月下娟娟影
領略風前細細香
茗椀琴絲堪靜對
舞裙歌

扇謾疎狂耐交似爾真良友歲歲清陰蔭草堂

次韻胡笠田春日苦雨二首

負却東風一半春虛檐浙瀝雨聲頻洗殘紅影花
無賴黯結青陽柳未勻隔院鶯吭憐蹇澀盈階草
色漫鮮新欲賡絕調蘭亭唱却使看峰盡日顰
濕雲挾雨幾層層二月春寒氣尚凝白髮怕言愁
萬種紅螺且進酒三升最難句似澄江練却易書
成癡凍蠅我自偏師甘避舍長城壁壘不須增
石樓禪師以詩見贈卽用原韻奉酬二首

聞道團蒲外蕭然萬慮空清談今有數白足將無
同不落宗門障偏饒國士風此心何處覓大意叩
支公

更有圖書癖閒情不易刪畫疑洪谷子詩似白香
山霽月光風意蒼松古柏顏多君瀟灑甚花塢爲
開關

桃花四首

朝朝細雨颺斜風寥落煙花二月中畢竟春光難
久秘一枝紅影入簾櫳

豔妝婀娜晚風前紅入腮痕最可憐冒雨獨來花
下立天台溪畔遇神仙

蕭蕭霜鬢客天涯每到春來倍憶家一事聊堪相
慰藉故鄉無此好桃花

萬點輕紅映素屏祇愁風雨易漂零欲留春色長
相伴折入官窰雙耳瓶

卽日二首

積雨喜新晴倚杖閒流盼遊蜂何處來蹙香桃花
辦

粉蝶與黃蜂來去花間舞祇知釀蜜甜誰識採花
苦

夜雨懷楊石湖主事石樓上人

細雨逗餘寒寂寂無所適黃昏掩閣臥靜聽檐間
滴氣逼爐煙凝濕紫牕紙黑應知羈旅客殘燈耿
虛壁折簡欲招之泥深馬無力相思正鬱陶牆外
誰家笛

次韻酬石樓上人二首

由來花厭北枝寒冷暑浮沉興已闌獨有上人偏

見予道余詩似鄭都官
茅塢家風今尚有早梅詩思世應無清新誰似樓
公句春雨聲中聽鷓鴣

次韻楊石湖月夜書懷

欄牙噪羣鵲風定雨初歇景物頓澄鮮虛堂蔭清
樾晚涼月更好圭玉比較潔對月正思君聞君欲
適粵楚粵俱萍蹤何處非羈客且傾宜陽酒莫綰
睂端結丈夫志四方自昔多離別

送楊石湖主政石樓上人遊嶺南

獻歲燒燈彈指過催花擘柳東風大十日春無一
日晴企脚北牕祇僵臥忽訝頭銜欣把臂隨風珠
玉生歎唾上人身心更無著米價麻斤久叅破頓
忘粗糲時相邀白塵清談驚四坐我來袁陽已九
春低頭矮屋苦無柰自從握手挹芝蘭洗盡胸中
塵土澗相將別我去嶺南此後詩篇更誰和世情
翻雲與覆雨古道於今久不作不如早趨承明廬
廟堂側席求賢佐他日鹽梅秉大鈞須念蒼生有
寒餓還將一語問石公饒舌得無師所呵

讀山谷詩集

涪翁與東坡俱稱千古士方寸將無同豈止詩一
紙詩篇亦復佳元祐兩人耳嵩泰與江河高深差
相似

綉毬花

袁陽惟司馬
署中有此

名花應耐冷冰署得芳叢碎砌千堆雪輕團二月
風何嘗矜豔色儘可殿春工自此城南路無心覓
小紅

口占

雜花已似錦修竹漸如鏃更有經綸在松陰結小
龕

立秋前三日夜雨卽事

相隔西風尚幾程檐間雨已作秋聲靜聽點滴人
高臥不快恩仇意自平酒罷續成難就句夢回數
盡欲殘更秀江新漲灘如失多少征帆犯曉行

友桂亭納涼二首

唧唧寒蟬絮語頻披襟散髮坐花茵忽看白動籬
間影吹上西風月半輪

竹逕陰森露氣浮西風蕭瑟已新秋
清涼有地人知少炙手從來笑五侯

月夜坐松下

世人慕紛華心醉紫與紅
獨有曠懷士愛此亭亭
松百尺無附枝夭矯盤虯龍
新秋雨初霽素月流
天中披襟坐其下蕭颯來天風
仰觀凌霜姿俯聽吟草蛩
心境兩清絕何必聞晨鐘
儻逢青牛士或遇白石翁
攜手直上蓬萊宮
還視塵界青濛濛

齋居

推却文書晝掩扃西風秋色滿閒庭
貪修闌藥衣沾雨戲飼盆魚指約萍
牆外猶餘雙翠柏竹間尚欠一茅亭
從人笑癖憎疎放祇覺幽居悅性靈

瓶花三首

愛摘名花作小叢淡黃淺白間深紅
玉瓶供向烏皮几此是先生化育功

幽蘭帶露海棠鮮折入軍持色更妍
盡日閒牕看不厭衆香國裏小神仙

寫生徐趙能臻妙不數黃荃染色花
却喜小瓶能

髮鬕幽香冷豔數枝斜

積雨驟寒偃臥煖衾甚適家人晚酌不暇就
也

一雨連旬日淒清似歲闌青綾欣乍煖白髮怯初
寒燭影差堪昵爐香且未殘嬾從兒輩飲高枕入
槐安

秋夕彈琴

白日澹將夕微涼生草閣娟娟晚色淨秋花媚籬
落取我素琴彈希聲愛賀若輕猱復微吟寒泉瀉

幽壑雖無攫繹能差殊鄭衛樂知音竟誰覓新月
窺簾幕

白露前一夕月夜聞蛩詰旦赴會城

唧唧蛩聲裏閒雲澹欲流却憐吟傍月那解客悲
秋露泫深宵竹燈明遠際樓吾廬堪嘯傲何事又
扁舟

舟中書所見

雖乏乘舟興聊堪避世囂水禽迎櫂起嵐色入秋
遙綠蔭看眠犢紅塵感敝貂不知天地外落落幾

漁樵

鍾山峽觀打魚歌

鍾山峽水急於箭噴沫跳珠目光眩如梭舴艋十
六隻截後邀前波上轉競放鷓鴣期大獲其柰臨
淵不生羨饑則附人飽則颺此理於今亦一驗羣
噪持竿強驅之擊碎秋光滿蓑濺雖非岐陽大合
圍却如昆明習水戰須臾銜得纖鱗出小者銀刀
大半面漁人長跽前致詞聊比羔羊爲公獻祇慙
水暖鷓鴣鳥驕不得鱒魴佐午饌償之以金苦苦辭

共道感公政平善我聞此語愧且嗟直道由來在
愚賤

卽日

午餐初罷閒遊目隄草如茵樹影齊何處飛來雙
白鷺衝煙掠水過前溪

中秋宿樟樹鎮

底事團圓節恁恁客裏過一般明月好無柰旅愁
何水氣侵衣冷秋煙著樹多遙思小兒女舞袖正
婆娑

遊齊雲山

少有山水懷五岳無緣至我聞齊雲名竊喜酬夙
志維時孟秋月此意始一遂初入境卽別青灘石
亂次瀲灩響玦環饒有仙源致小憩登山輿盤紆
歷幽邃遙望千丈巖匹練自天縑豈逢五丁鑿此
理難思議行行入茂林蕭森起涼吹時聞怪禽呼
乍見驚狖避巖畔逢僧雛導引入古寺聊借繩床
眠稍息僕夫瘁開簾日已晡斜陽轉斌媚砌下花
殷紅籬外柳蒼翠詰旦陟西嶺犖确更不易霧雨

常冥冥孱骨時惴惴叱馭轉舊途宛如釋重累山
遊雖可樂令我發深喟倘乏濟勝具莫把入林臂

月夜感懷

忽覩蓬牕月方知夜已深長江流浩浩孤燭影沉
沉婚嫁何年事功名此際心蕭蕭誰晤語聊作洛
生吟

中秋後二日泊生米

月過中秋影尚清戍樓擊柝報初更一江水氣昏
昏白數點漁燈耿耿明涼逼衾衣宵露下風迴乙

夜暮濤平遙聞鼓笛乘流至千載猶傳鐵柱聲

九日

年年風雨暗重陽此日晴暉遍野塘歷歷青山供
客目離離紅葉染秋光題糕已減劉郎興泛菊空
思栗里觴却喜扁舟無滯礙晚風斜日任徜徉

晚泊四溪步月

綠陰深處泊歸航落日微風水氣涼獨上平岡邀
霽月頓忘濁酒醉他鄉江流滾滾成今古案牘勞
勞盡糝糠咫尺衙齋秋色好繞籬開遍紫絨妝

對月口占

萬里晴開月一鉤葭蒼露白正深秋此時意景無
人會獨倚蓬牕看斗牛

正月廿二日接坤兒家信口占寄之二首

別離纔幾日已過試燈時漠漠春陰重茫茫夢路
迷逢人詢去棹獨坐計歸期汝母身初健參苓好
護持

遷延將半載祇覺易分離忽接平安信微吟杜老
詩幾時過白下何日抵南池若遇梅花使殷勤寄

我知來書言自
濟寧登陸

晚至豐城

繞岸徐看百丈牽參差遠樹冒飛煙千秋物說豐
城劔五兩風催上瀨船波底長虹搖落日鏡中短
髮送流年歸途漸識春消息黃鳥青蘋卵色天

江月

風定半輪明澄波印素影我欲釣清光夜靜春江
冷

喜晴

酒醒夢初回朝曦入牖來乍增人意爽忽聽鳥聲
催安分甘中隱藏名藉散材獨憐春已半柳眼尚
慵開

春江清淺可鑒毛髮欣然有作

微風送輕舸夷猶春波裏波光如鏡明粼粼清見
底青山照眉黛白鷗任翔止灑然悅心神吾欲洗
吾耳

菜花

燕嬌鶯情春無賴乍雨還晴客斷腸莫道青陽無

覓處東風十里菜花香

自章門放舟花尚含苞至分宜春色燦然矣
淒淒煙雨浹甸中寒勒花枝未破紅剛至太平橋
上望一時桃李笑春風

送嚴曉亭赴補入都二首

積雨耽高臥微風喜乍晴正期留客醉何意送君
行煙澹孤邨色角寒古戍聲長途須自愛虛席待
承明

舊仰神君譽新邀 聖主知况逢喜起日正是對

揚時白簡陳金鑑清風滿玉墀調羹原世業經術
重相期

懷遠

行人日以遠斗柄日以轉幽蘭漸著花春蠶已成
繭欲寄尺素書魚稀秀江淺積雨晝冥冥腸斷空
階點

除夕前二日自省回郡

登舟解纜意悠然晏起遲眠得自便一卷陶詩消
臘酒數聲爆竹破春煙浮名我識蕉中鹿毒霧誰

思溪上鳶有子可教書可讀竟將薄祿換耕田

除夕風雨竟夕

立春以來雨不歇濕雲漠漠散還結欲爲東皇清
路塵不管行人苦跋涉連日霏微未破塊一夕傾
盆似川決敲枕臥聽淙淙聲萬畝蓮塘響枯葉短
篷已漏燭已燼颯颯空林勢猶烈我聞雨澤亦有
數莫使恩膏容易竭猶憶年時苦旱乾滴盡農夫
眼中血

甲午元旦

鳳曆初看斗柄回船牕晴色亦佳哉遠山沐雨曛
藍出野水粘雲釀碧來休訝年衰酣柏酒久撩宦
拙老樗才人生此日閒難得笑指江梅已半開

人日

七葉仙萸長十年噩夢過青衫無酒債白髮喜春
和羹菜隨緣設詩篇漫興多嬌癡憐稚子學蹋采
茶歌

讀大父棠邨詞

黃髮皤皤碩果臣惟將精白答
楓宸閒情也著

梅花賦知是開元第幾人

奉懷工部魏先生

月色溶溶夜未分挑殘銀燭念離羣十年曾立燕山雪廿載空停楚澤雲聞道水衡頻借箸何時尊酒更論文兒曹新種藍田璧玉樹叢中愧右軍

元夕懷中美太僕

對酒憐佳節臨風憶同鄉一麾人漸老千里月同明公自歌天馬余將聽曉鶯知交渾落落莫負歲寒盟

十六夜葛廬賓太守招飲觀放花火醉歌

青陽初過一十五碧落未放銀蟾吐癡雲何事妬姮娥千層密遮清虛府東風颯颯吹晚煙散作梨花深院雨風雨難阻人意豪肯使良宵歎索處家家聯袂歌銅鞮隊隊小兒打腰鼓風流太守惜景光新製華燈遍堂廡梨園角觝互逞技洞開重門觀如堵歌管乍歇火樹然點點明星落寒渚須臾爆竹齊奔放萬枝離弦射潮弩豈是有意競豪華欲令斯民知樂土入夜雲霧漸開霽如水清光照

庭戶主人大呼賓從歡重暖蒲萄擘麟脯不知今夕是何夕顧影頽唐神奕奕舉酒酌月再拜言但願歲歲花前浮大白

花魂

逐霧隨煙何所之沉香亭畔漫栖遲肯同翠羽娛遷客不比紅顏怨畫師淡淡月描空裏色珊珊影認定中姿祇愁風雨還相妬楚些頻招知未知

鳥夢

啼徹鉤輈柳外聲華胥國裏覓嚶鳴還鄉乍舉冥

冥翻趁蝶偏憐栩栩情三匝遶枝聊借息五陵挾彈漫相驚東風牽引何時覺一院梨花空月明

早春桃李二首

東風未及半桃李已盡發淺白與深紅爭妍更比潔春雨日飄灑穠華益堪悅始知真色人脂粉原不屑

我聞桃李下不言自成谿德盛人自歸其理亦若茲末世競虛譽延攬以居奇一朝解相印馮驩知是誰

寄象曼魏先生

夫子天挺才留心經世務典墳更所耽丹鉛盡四
庫猶憶官西陵痼瘵切婦孺寧甘甑生塵肯使民
無袴勞深蒙內召猶然困錢布共服心計精晏滉
今重遇冬官再晉秩才名益軒翥卿貳與庶司人
人據情愫方期秉節鉞霖雨八紘澍胡爲幽谷姿
竟遭蛾眉妬料敵有充國績學推轅固經術誠有
餘年齒何妨暮 廊廟方求賢執事無乃誤用舍
雖人爲窮達有定數歸臥舊茅茨朗吟新詩句卽

此亦稱適詎必東華路因風布區區從曳林泉趣

讀漁洋詩集

虛牕微雨歇燒燭誦遺詩鵬鶚摩雲格芙蕖出水
辭有心拋絃冕無意放楊枝玉樹今黃土誰銘有
道碑

懷本如禪師

茅菴新築槿籬遮聞道年來景更加何日板橋三
日雪與君策杖探梅花

題周崑來畫龍

周生丹青天下奇前有公麟後和之裁紅暈碧皆
異彩千縑一幅人爭持與酣偶爾貌神物鬚張鬣
奮鱗之而元氣淋漓生意足衙衙勢欲翻天池雲
影如墨四擁蔽黯黹千里天低垂爪痕時於罅際
露恍覩夭矯盤空姿神龍見首不見尾俗學未許
窺藩籬青華山人癖好古購來不吝千朱提空齋
素壁走雷雨鱗甲欲動雲爭飛客來不辨紙與畫
祇覺颯颯萬壑寒飈吹周生周生技至此信有天
授非人爲

新柳

閑園也復費春工垂柳千條擘曉風照水影憐橫
黛淺凝妝人倚小樓紅漫言嫩葉難藏鳥已覺柔
絲可拂驄底事無情偏惹恨纖腰曾鬪楚王宮

讀王孟集

雋永王摩詰清深孟浩然一時雙日月千古照山
川每讀驚人句偏思幸蜀年三郎莫長恨風雅炳
中天

月夜

積陰埽盡迴無塵疑向冰壺貯此身露重那憐深
夜苦官閒已耐十年貧離離花影搖疎檻淡淡眉
痕憶遠人睡鴨香殘慵就枕呼童重碾建溪春

次王去瑕留別原韻送之歸武林二首

自與右軍訂縞紵奇文疑義喜同論三都新著名

山業

君新有著述

一劔常懷國士恩

君舊館於浙江僉憲郝公署

每遇秋風

思舊隱曾分春色過閒門

嘗以花種貽余

臨岐更寫空羣意

似許孫陽目未昏

仲宣莫漫悵依劉蠶繭鵝溪足應求雪裏芭蕉唐

結構春前楊柳晉風流栖栖久客君應倦碌碌宵
行我未休此去清和天氣好煙雲盡入錦囊收

君工繪事

題廬山木瓜洞石嵩隱遺像

嵩隱高風聞夙昔矯矯不是紅塵客早年嵩嶽餐
煙霞晚歲匡山弄泉石本為逃名名益著走卒兒
童聲籍籍更能精研四子書儒道抵牾俱冰釋誰
濡綵筆繪此圖桐帽椶鞵神奕奕灑灑流水響千
巖謾謾松風生兩腋先生枯坐無一語獨鶴當階
自鼓翮我聞廬阜近玉京木瓜洞裏多仙跡先生

不儒亦不仙，啜茗看花意。何適八十九年如風燈，
笑指虛無是窟宅。西牕遺橐五千微，明月清風自
朝夕。斯人斯世豈常有，悔不從君覓金液。聊題數
語志景行，花雨穆穆落几席。

納涼

畏熱頻移席，涼生落日風。花香來靜夜，螢火出深
叢。日鑄甌浮碧，湘簾燭映紅。清機詩思引人語，小
墻東。

午日

道士尹誠齋
以秘方見示

蒼蘆初飛冉冉香，安榴照眼綠蒲長。蟻尊聊把天
中節，羽客新投海外方。射糗稚兒競綵服，浴蘭小
婦佩朱囊。老懷誰識悠然處，獨傍叢筠覓晚涼。

午後驟雨旋即晴霽月上偶作

雷車陡起戰斜陽，贏得虛牕一晌涼。翠滴新篁枝
半偃，潤流古硯墨增香。平池水漲魚兒喜，曲徑泥
融燕子忙。倏送好風雲盡捲，依然明月到匡床。

十二月四日大雪

大雪連日夕朔風撼山川，松竹半摧折。魚龍潛深

淵復聞河水合舟行屢不前此事微見聞云已三
十年冬暖固非宜毋乃氣太偏重裘尚僵縮何況
寒無氈惻惻念下民終夜不遑眠何當吹鄒律幽
谷迴春妍

雪後眺望

雪中埽微逕爲愛雪後景扶杖臨層臺千林色同
靜衝寒指歸翼迴霰颺素影久竚眩雙眸泠然御
風冷

先大父生忌

廿載音容隔英靈何所之又逢初度日回憶介肴
時歌吹銷銀蠟梅花點玉卮祇今蘋藻薦霜露愴
天涯

除夕夜坐

瀟瀟殘雪滴深更暖閣圍爐萬籟清何處綺羅爭
餽歲有人詩酒自陶情梅花香裏茶初熟楊柳梢
頭月欲生記得當年逢此夕短篷寒雨對孤檠

早行

鄰雞唱未徹繩床方酣眠僕御已嚴駕輾輾衝曉

煙四野色澗朗三星猶在懸曲肱聊假寐霜風吹
華顛須臾晨曦升萬象頓澄鮮何異草昧時文明
屆中天塞帷若有會秋光滿眼前笑彼北牕人空
談羲皇年

宿舊縣值余生朝

客途秋色裏又遇始生時玉笋憑誰勸邨醪祇自
持風煙環舊縣懷抱寄新詩何日同扶醉花前倒
接離

又

初遷熊軾赴京華車馬蕭蕭客路賒茅店莫辭頻
進酒有人此夕憶天涯

又

三秋歲歲釀流霞待得稱觴泛菊花一自折腰爲
吏後介眉強半在天涯

舒城懷古

東南割據展雄圖年少登壇事有無一戰能存吳
社稷百年猶識漢規模從容談笑兵機出指畫河
山意氣孤油幕春風親顧曲周郎原未是迂儒

野菊

野花如靜女
婉婉却塵俗
采之欲遺誰
明月秋江綠

夜酌

涼月沈沈影漸移
荒城旅舍漏偏遲
三杯濁酒孤燈裏
何似西牕鬪茗時

趙崑石畫竹

湖州仙去千餘年
寸縑尺素人爭傳
其如墨寶天亦惜
六丁收去如雲煙
後起吳王傳其法
尺寸勢

欲摩蒼天固知胸
中有成竹吮毫濡墨神
已全中州趙君負奇氣
好客不計囊中錢
興來自寫竹萬个
煙枝雨葉何便娟
濃淡低昂各有意
寧與時手論媿妍
我欲置之書畫船
菰蒲秋雨熱龍涎
茗椀靜與此君對
何如把臂竹林賢

途遇袁陽士人

憶別朝朝悵暮雲
斜陽古道恰逢君
惓惓難盡臨岐話
兩字平安倩寄聞

列翠軒言

卷

列翠軒詩

門人徐德成謹校

二



